

## SCRIPT OF MORNING GOJRI NEWS BULLETIN 22AUG 1015 HRS

ما رنینگ گو جری نیو ز بلیٹن مو رخہ 22 اگست 2025

\*\*\*\*\*

یوہ آکا شوانی جموں ہے عبدالرحمان تیں خبر سُنو۔

\*\*\*\*\*

### JK CABINET MEET

جموں کشمیر کابینہ غی میٹنگ اچ تھوڑی دیر پہلاں 10 بجے سول سیکرٹریٹ سرینگر مانہ وزیر اعلیٰ عمر عبداللہ غی صدارت مانہ شروع ہوئی ہے جس مانہ سارہ کابینہ وزیر شرکت کر رہیا ہیں حالیہ بدل پھٹن غا واقعات تیں بعد پہلی کابینہ میٹنگ ہے واضع رہے قدرتی آفات آلا سیلانی واقعات چشوٹی کشتواڑ تے کٹھوعہ ضلع غ اگج علاقہ مانہ پیش آیا تھا کابینہ غی طرفوں اس گل ور غور کرن غو امکان ہے جے متاثرین غی بحالی واسطے حکومت غی طرفوں کہ اقدامات کیا جیں امکان ہے جے کابینہ غی طرفوں ستمبر مہینہ غا آخر توڑی سرینگر مانہ اسمبلی اجلاس پلان غی تجویز وی پیش کی جیں گی۔

\*\*\*\*\*

### LG WATER SPORTS

لیفٹیننٹ گورنر منوج سنہا نے کل سرینگر غی ٹل جھیل ور کھیلو انڈیا آبی کھیڈ تہوار مانہ شرکت کی جت انہاں نے 28 ریاستاں تے مرکزی زیر انتظام علاقہ تیں آیا واہ 800 کھیڈاریاں گو استقبال کیو جموں کشمیر مانہ آبی کھیڈاں بارے بھارت غو دارلحکومت غے طور ابھرتو وو قرار دیتا واں انہاں نے اس تقریب مانہ امن ترقی تے بدھتی وی کھیڈاں غی ثقافت غی علامت قرار دتو ترے روزہ اس کھیڈ میلہ ڈریگن بوٹ شکارہ دوڑ روئنگ کینوئنگ تے دوجا مظاہراتی مقابلہ شامل ہیں اس موقع ور خطاب کرتا واں لیفٹیننٹ گورنر نے کہیو جے پچھلے 5 تے 6 براں مانہ جموں کشمیر مانہ منعقدہ کھیڈاں غو تقریبات غو پیمانے تے وسعت ہے مثال ہے اسے دوران وزیر اعلیٰ عمر عبداللہ نے ٹل جیھیل ور ہون آلا پہلہ کھیلو انڈیا آبی کھیڈ تہوار مانہ ایک تاریخی لمحو جیہرو کھیڈاں مانہ جموں کشمیر غی قدرتی خوبصورتی غے سنگ جوڑے قرار دتو وزیر اعلیٰ نے جت تیں زیادہ کھیڈاں غی روح مانہ اُجاگر کیو تے اُمید ظاہر کی جے یوہ کھیڈ تہوار نوجواناں نانہ متاثر کرے گو۔ تے وادی مانہ مزید ایسی تقریبات غی راہ ہموار کرے گو۔

\*\*\*\*\*

### CM VICTIM MEET

وزیر اعلیٰ عمر عبداللہ نے کل کشتواڑ تے کٹھوعہ مانہ حالیہ بدل پھٹن تے اچانک تباہ کُن سیلاب غا متاثرین واسطے امدادی اقدامات غو جائیزو لیو ایک اعلیٰ سطحی میٹنگ مانہ انہاں نے فوری امداد بنیادی خدمات غی بحالی تے طویل مدتی آفات سنگ نمڑن غی حکمت عملی ور زور دتو کشتواڑ ضلع غا چسوٹی گراں غا سانحہ مانہ اُجاگر کرتا واں انہاں نے حساس علاقہ مانہ واضع معیاری اصولی طریقہ کار غی ضرورت ور زور دتو وزیر اعلیٰ نے کہیو ہے جے ترجیحات رلیف تے بحالی ور ہونی چائیں جدکہ حکومت تعمیر نع زرعی اراضی غی بحالی تے بجلی غی عارضی فراہمی واسطے جنریٹرز غا استعمال مانہ یقینی بناوے گی جد تک کہ مکمل بحالی نہیں ہو جاتی۔

\*\*\*\*\*

### DY CM RAS

نائب وزیر اعلیٰ سریندر چودھری تے وزیر اعلیٰ گا مشیر ناصر اسلم وانی نے کل سول سیکرٹریٹ سرینگر مانہ ریہیٹیشن اسٹینٹ سکیم غے تحت 8 تقرری نامہ سونپیا اس موقع ور نائب وزیر اعلیٰ نے منتخب امیدواراں نانہ مبارک باد دیتا وں کہیو کہ وے لگن تے ایماندادی تیں عوام غی خدمت کریں۔ وزیر اعلیٰ گا مشیر نے یقین دہانی کرائی کہ حکومت روزگار غا مزید مواقع پیدا کرن واسطے پُر عزم ہے۔ نوا ملازماں نے ایماندادی تیں کم کرن گو عہد کیو۔ رہنماواں نے روز دیتا وں کہیو کہ وزیر اعلیٰ عمر عبداللہ غیقادات مانہ انتظامیہ بھرتی غا عمل نانہ تیز کرن واسطے پُر عزم ہے۔

\*\*\*\*\*

## MOHSIN GOLD

کھیلو انڈیا آبی کھیڈ تہوار 2025 مانہ پہلو سونہ غو تمغو جت غے ستاراں براں غا محسن علی کانڈ نامی ایک مقامی شکارہ آلا نے جموں کشمیر غو سر فخر سنگ اوچو کیو ہے محسن علی نے ڈل جھیل ور مرداں غی ہزاراں میٹر کایاکنگ تقریب مانہ پہلی پوزیشن حاصل کی ہے جیساں ہی اُنہاں نے فائنل لائین عبور کی لوکاں غو ہجوم خوشی سنگ جھوم اٹھو تے لوک جزبات سنگ مغلوب ہو گیا اُنہاں غی یاہ کامیابی جموں کشمیر مانہ آبی کھیڈ واسطے ایک تاریخی لمحہ غی حیثیت رکھے۔

\*\*\*\*\*

## WEATHER

محکمہ موسمیات نے 23 اگست تیں 26 اگست تک جموں کشمیر غا بکھ بکھ حصاں مانہ تیز تیں شدید بارش تے گرج چمک آلا طوفان بارے انتباہ جاری کیو ہے ان شدید بارشاں سنگ متاثرہ ہون آلا ضلعاں مانہ جموں ریاسی ادھمپور سانہ کٹھوعہ راجوری اننت ناگ تے گلگام شامل ہیں جد کہ درمیانی تیں شدید بارشاں غی پیشن گوئی پونچھ رام بن ڈوڈھ تے کشتواڑ واسطے کی گئی ہے محکمہ موسمیات نے خبر دار کی وہے جے اس دوران شدید بارش بدل پھٹن اچانک آن آلا سیلاب زمین کھسکن مٹی غا تودا ٹہن تے پتھر پین غا امکانات ہیں لوکاں نانہ مشورو دتو گیو ہے جے وے دریاواں ندی نالاں تے کچھ ٹحانچاں تیں دور ریں تانجے اُن غی حفاظت ممکن وے عہدے داراں نے متعلقہ تمام فریقین نانہ ہدایت دتی ہے جے وے ضروری احتیاطی تدابیر اختیار کریں تے حفاظتی رہنما اصولاں ور عمل کریں تانجے اس شدید موسم غے دوران خطرات نانہ کھٹ کیو جاسکے۔

\*\*\*\*\*

## PTC ANNOUNCEMENT

علاقائی خبراں آلا شعبہ آکاشوانی جموں غی طرفوں ضلع جموں واسطے عارضی نامہ نگاراں یعنی پی ٹی سی واسطے درخواست منگی گئی ہیں۔ مجوزہ پرفارمہ ور عارضی نامہ نگار غی پوسٹ مانہ دلچسپی رکھن آلا ایسا امیدوار درخواست دے سکیں گا جہیڑا ضلع جموں گا بسنیک ویں تے اُن غی عمر 24 براں تیں 50 براں غے بشکار وے۔ پی ٹی سی غی اس پوسٹ واسطے تعلیمی قابلیت پی جی ڈپلومہ یا صحافت غا شعبہ مانہ ڈگری یافر تسلیم شدہ یونیورسٹی تیں گرجویشن غے ہمراہ 2 براں غو صحافت مانہ تجربو مقرر کیو گیو ہے۔ اس تیں علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہ تجربو وی ضروری ہے۔ عارضی نامہ نگار غی پوسٹ مانہ دلچسپی رکھن آلا امیدوار واسطے لازمی ہے جے ضلع صدر دفتر جموں یا اس تیں 10 کلو میٹر غادائرہ غے اندر رہائش پزیر وے اس سلسلہ مانہ درخواست غی ہارڈ کاپی ضروری دستاویزات غے ہمراہ ہیڈ ریجنل نیوز یونٹ آکاشوانی پنچترتھی جموں مانہ بزات خود

آئینده 31 اگست 2025 توڑی دے سکیں۔ اس بارے مزید جانکاری ویب سائٹ  
www.newsonair.gov.in-ور دستیاب ہے  
\*\*\*\*\*